



Dr. Emsley Tromp di Banko Sentral:

“Análisis ku mira riba futuro ta sentral den supervishon”

WILLEMSTAD - “Inovashon ta e forsa motor pa Banko Sentral di Kòrsou i St. Maarten por ehekutá su tres tareanan prinsipal na un manera efektivu. Pero inovashon no ta fásil semper. Miedu pa tur loke ta deskonosí hopi biaha ta generá resistensia kontra idea nobo. P’esei ta importante pa krea un ambiente ku ta promové inovashon i ku ta yuda surpasá e resistensia. Fundashon Pro Inovashon Nashonal (PIN) ta hasi bon di pone inovashon sentral den e Foro Nashonal Ekonómiko akí.” Asina Dr. Emsley Tromp, Presidente di Banko Sentral di Kòrsou i St. Maarten a bisa na apertura di e konferensia di tres dia akí.

Promoshon di stabilitat di nos valuta ta definí komo un di e tres tareanan prinsipal den statutonan di Banko Sentral. P’esei Banko Sentral ta hiba un maneho monetario. Den e último dékadan akí, e asento den e maneho ei a hala di un kòntrol direkto riba dunamentu di krédito atraves di plafòn di krédito, pa instrumentonan di krédito mas fleksibel. Den pasado, bankonan ku no a yega e plafòn di krédito ainda, por a negoshá nan márgen ku otro bankonan ku sí ke surpasá e plafòn.

Pero riba término largu, medidanan pa restringí krédito por opstakulisá kresementu di spesialmente bankonan nobo, i di e forma ei a stroba kompetensia den e sektor bankario.

P’esei, for di kuminsamentu di e siglo akí, instrumentonan mas nobo ta sentral den maneho monetario di Banko Sentral, manera un obligashon di reserva pa limitá aksesu na likides pa ekspanshon di krédito, kompletá pa vindishinan di *certificates of deposits* (CD’s).

Kresementu di krédito

Despues ku Hulanda a sanea nos debenan den kuadro di e kambionan konstitushonal, a surgi un surplus grandi di likides den e sektor bankario. Kondishonnan di reserva mas haltu no tabata sufisiente mas pa dominá e kresementu di krédito, i konsekuentemente no tabata yuda mas pa kontrolá importashon. Subida di importashon a kousa un bahada di e reserva di divisa. P’esei a bolbe apliká e plafòn di krédito temporalmente, loke a yuda baha e défisit riba balansa di pago di NAF. 500 mion na febrüari 2012 pa NAF. 62 mion na e momentu akí.

Bononan empresarial

Otro konsekuensia di e programa di saneamentu di debe tabata ku e merkado pa bono di gobièrnu a kai den un fregá di wowo, motibu pa kua Banko Sentral no por a ehekutá transakshonnan habrí riba merkado komo parti di su maneho monetario. Esaki a bolbe rekerí un solushon inovativo i asina a kuminsá desaroyá merkado pa bononan empresarial. Miéntras ku esaki ta hañando bon akohida den eksterior, aki hende ta mir’é ku masha reserva. “Mi a pasa e parti mas grandi di mi bida desaroyando i aplikando maneho monetario. Ta inkreibel ku despues di e Gran Reseshon di 2008 ainda tin hende ku ke sigui un maneho monetario konvenshonal.”

Kusinchi

Promoshon di solides di nos sistema finansiero tambe ta menshoná komo un di e tres tareanan prinsipal di Banko Sentral den e statutonan di Banko. E krísis finansiero a revelá diferente punto suak den e

forma ku ántes tabata supervisá. Por ehèmpel, promé ku e krísis tabata fiha espezialmente riba entidatnan individual, pero no sufisientemente riba e stabilitat finansiero di e sektor den su totalidat. Pero despues di e krísis a kuminsá fiha partikularmente riba e integridat finansiero di henter e sektor pa logra mas stabilitat finansiero. Miéntras supervishon promé ku e krísis tabata basá na promé lugá riba datonan históriko di e entidatnan, awor e maneho ta karakterisá pa análisisnan ku mira riba futuro. E análisisnan ta kalkulá konsekuensia di shòknan ekonómiko i ta preskribí formashon di kusinchi den tempu bon pa kompensá pèrdida den tempu malu. Banko Sentral ta apliká e aserkamentu mas amplio akí, i den kuadro di esei a instituí un departamentu ‘Stabilitat Finansiero’ entrante yüli di e aña akí.

Plaka di papel nobo

Pa promoshon di un sistema di pago sigur i efisiente tambe inovashon ta krusial. Asina inovashon ta hunga un papel importante den diseño, durabilidad, gastu di produkshon i prosesamentu di plaka di papel. Kontinuamente ta mehorá aspektonan di seguridat tambe pa evitá falsifikashon. Inovashon ta kontribuí na aparatonan nobo ku ta traha mas lihé i ta hasi ménos fout den stipulashon di kalidat di plakanan di papel den sirkulashon. Banko Sentral ta evaluá tur e kalidatnan nesensario pa e plaka di papel nobo ku ta sperá pa hopi tempu kaba. E echo ku ta tardando asina tantu pa tuma desishon ta trese riesgonan innesensario pa e sistema aktual.

E sistema di pago no-kèsh entre klientenan i nan bankonan ta kana diariamente via Banko Sentral. Pa gran parti, e proseso akí ta outomatisá via Netherlands Antilles Clearing System (NACS), na kua tur banko lokal ta konektá, inkluso esnan na e islanan BES. Kontinuamente ta inová i mehorá e sistema akí tambe. Pasobra inovashon no tin keber solamente ku inventonan kompletamente nobo, pero tambe ku mehoramentu kontinuo di produkto- i prosesonan eksistente □